

I. DISPOSICIÓN XERAIS

MINISTERIO DA PRESIDENCIA

12008 *Real decreto 941/2010, do 23 de xullo, polo que se modifica o Estatuto da Axencia Española de Cooperación Internacional para o Desenvolvemento, aprobado polo Real decreto 1403/2007, do 26 de outubro.*

O Real decreto 1403/2007, do 26 de outubro, polo que se aproba o Estatuto da Axencia Española de Cooperación Internacional para o Desenvolvemento, dispón que lle corresponde á Axencia Española de Cooperación Internacional para o Desenvolvemento o fomento, a xestión e a execución das políticas públicas de cooperación internacional para o desenvolvemento, dirixidas á loita contra a pobreza e á consecución dun desenvolvemento sustentable nos países en desenvolvemento. Pola súa banda, o artigo 17 do Estatuto da Axencia Española de Cooperación Internacional para o Desenvolvemento establece a estrutura administrativa básica da Axencia. E o Real decreto 822/2008, do 16 de maio, modificou o dito artigo 17 e desenvolveu a estrutura administrativa básica da Axencia.

Como consecuencia da aplicación do Plan de Racionalización da Administración Xeral do Estado, cómpre abordar unha reestruturación da AECID que cumpra co dobre obxectivo de reducir a súa estrutura organizativa e reorganizar os recursos dispoñibles, dotando a Axencia dunha estrutura máis áxil e flexible para o fomento, xestión e execución das políticas públicas de cooperación internacional para o desenvolvemento.

Na súa virtude, por iniciativa do ministro de Asuntos Exteriores e de Cooperación, por proposta conxunta da ministra da Presidencia e da ministra de Economía e Facenda, e logo de deliberación do Consello de Ministros na súa reunión do día 23 de xullo de 2010,

DISPOÑO:

Artigo único. *Modificación do Estatuto da Axencia Española de Cooperación Internacional para o Desenvolvemento, aprobado polo Real decreto 1403/2007, do 26 de outubro.*

O Estatuto da Axencia Española de Cooperación Internacional para o Desenvolvemento, aprobado polo Real decreto 1403/2007, do 26 de outubro, queda modificado nos seguintes termos:

Un. A letra c) do número 2 do artigo 11 queda redactada da forma seguinte:

«c) Exercer a superior dirección da Oficina de Acción Humanitaria e do Departamento de Cooperación Multilateral.»

Dous. A letra b) do número 2 do artigo 12 queda redactada da forma seguinte:

«b) Vogais.

Director/a da Axencia, quen presidirá as reunións en ausencia do/a presidente/a.

O/a director/a xeral de Planificación e Avaliación de Políticas de Desenvolvemento do Ministerio de Asuntos Exteriores e de Cooperación.

Outros dous directores xerais do Ministerio de Asuntos Exteriores e de Cooperación, designados libremente polo ministro.

Dous funcionarios do Ministerio de Asuntos Exteriores e de Cooperación, designados libremente polo ministro, con rango de subdirector xeral ou equivalente.

En representación doutros ministerios (con nivel mínimo de director/a xeral), o Consello Reitor integrará catro persoas:

O director xeral de Financiamento Internacional da Secretaría de Estado de Economía do Ministerio de Economía e Facenda.

O director xeral de Comercio e Investimentos da Secretaría de Estado de Comercio do Ministerio de Industria, Comercio e Turismo.

Un representante da Secretaría de Estado de Facenda e Orzamentos do Ministerio de Economía e Facenda que designará o seu titular.

Un representante do Ministerio da Presidencia que designará o seu titular.

En representación dos traballadores, dous representantes designados polas organizacións sindicais máis representativas da Administración xeral do Estado.»

Tres. O número 2 do artigo 17 queda redactado da forma seguinte:

«2. Baixo a dependencia xerárquica do director da Axencia existirán en España:

- A Dirección de Cooperación para América Latina e o Caribe;
- A Dirección de Cooperación para África, Asia e Europa Oriental;
- A Dirección de Cooperación Sectorial e Multilateral;
- A Dirección de Relacións Culturais e Científicas;
- A Secretaría Xeral.

As súas funcións, referidas nos seus respectivos ámbitos territoriais, sectoriais ou funcionais ás que establece o capítulo II deste estatuto para a Axencia, son as seguintes:

a) Correspóndelle á Dirección de Cooperación con América Latina e o Caribe fomentar, xestionar e executar as políticas públicas de cooperación internacional para o desenvolvemento, dirixidas á loita contra a pobreza e á consecución dun desenvolvemento humano sustentable nos países de América Latina e o Caribe, sen prexuízo das competencias que correspondan a outros departamentos ministeriais.

O director dirixirá e coordinará dous departamentos: o de Cooperación con Centroamérica, México e o Caribe e o de Cooperación cos Países Andinos e o Cono Sur.

b) Correspóndelle á Dirección de Cooperación con África, Asia e Europa Oriental fomentar, xestionar e executar as políticas públicas de cooperación internacional para o desenvolvemento, dirixidas á loita contra a pobreza e á consecución dun desenvolvemento humano sustentable nos países de África, Asia e Europa Oriental, sen prexuízo das competencias que correspondan a outros departamentos ministeriais.

O director dirixirá e coordinará tres departamentos: o de Cooperación con África Subsahariana, o de Cooperación co Mediterráneo e Mundo Árabe e o de Cooperación con Asia e Europa Oriental.

c) Correspóndelle á Dirección de Cooperación Sectorial e Multilateral fomentar, xestionar e executar as políticas públicas de cooperación internacional para o desenvolvemento no ámbito sectorial e multilateral e asegurar a concertación das políticas de desenvolvemento sectoriais con outras axencias multilaterais, especialmente no ámbito da Unión Europea e do sistema de Nacións Unidas, en coordinación estreita cos órganos competentes do Ministerio de Asuntos Exteriores e de Cooperación, así como representar a AECID nas relacións que sobre a materia se establezan cos distintos departamentos ministeriais.

Esta dirección xestionará, executará e administrará o Fondo de Cooperación para Auga e Saneamento creado pola disposición adicional sesaxésimo primeira da

Lei 51/2007, do 26 de decembro, de orzamentos xerais do Estado para 2008, realizando as funcións establecidas regulamentariamente.

No exercicio das súas funcións, o Fondo de Cooperación para Auga e Saneamento actuará en colaboración coa Dirección Xeral de Planificación e Avaliación de Políticas para o Desenvolvemento da Secretaría de Estado de Cooperación Internacional e cos distintos departamentos con competencias no ámbito da política de cooperación internacional para o desenvolvemento, con respecto ao establecido na Lei 23/1998, do 7 de xullo, de cooperación internacional para o desenvolvemento.

O director/a de Cooperación Sectorial e Multilateral dirixirá e coordinará tres departamentos: o de Cooperación Sectorial e de Xénero; o de Organizacións Non Governamentais de Desenvolvemento (ONGD) e o do Fondo de Cooperación para Auga e Saneamento.

d) Correspóndelle á Dirección de Relacións Culturais e Científicas fomentar, xestionar e executar as políticas públicas de cooperación cultural para o desenvolvemento; a xestión dos servizos culturais da AECID; a cooperación no ámbito da capacitación de capital humano; a cooperación universitaria e científica ao desenvolvemento; as relacións e convenios internacionais no ámbito cultural e científico; e as competencias atribuídas ao Ministerio de Asuntos Exteriores e de Cooperación para a promoción e o desenvolvemento das relacións culturais e científicas con outros países, sen prexuízo das competencias que correspondan a outros departamentos ministeriais.

O director dirixirá e coordinará tres departamentos: o de Cooperación e Promoción Cultural, o de Cooperación Universitaria e Científica e o de Coordinación de Relacións Culturais e Científicas.

e) Correspóndelle á Secretaría Xeral o desempeño das funcións relativas á xestión e administración dos recursos humanos, incluída a formación destes, a xestión dos medios económico-financeiros, informáticos, loxísticos e materiais, así como a contratación, organización e produción normativa, asesoramento, calidade, inspección, arquivo e rexistro, en estreita coordinación coas unidades competentes do Ministerio de Asuntos Exteriores e de Cooperación, co fin de prestar o apoio necesario aos órganos e unidades da Axencia para o cumprimento das súas funcións.

O secretario xeral dirixirá e coordinará tres departamentos: o de Recursos Humanos, Conciliación e Servizos Xerais; o de Xestión Económica, Financeira e Orzamentaria e o de Sistemas e Tecnoloxías da Información.»

Catro. O número 8 do artigo 17 queda redactado da forma seguinte:

«8. O director da Axencia poderá delegar nos directores/as de Cooperación Xeográfica, Sectorial e Multilateral, Relacións Culturais e Científicas, no secretario/a xeral e no xefe da Oficina de Acción Humanitaria, a dirección, coordinación e interlocución da estrutura de centros no exterior. Nese caso, por delegación, a relación entre a sede central da AECID e as oficinas técnicas de cooperación, os centros de formación e os centros culturais levarana os mencionados directores/as e o xefe da Oficina de Acción Humanitaria, os cales poderán enviar no exercicio das súas funcións nos seus respectivos ámbitos, en nome do director da Axencia, comunicacións e instrucións formais dirixidas aos coordinadores das OTC e aos directores de centros de formación e culturais.»

Cinco. A letra a do número 1 do artigo 38 queda redactada da forma seguinte:

«1. Terán a consideración de persoal directivo da Axencia:

a) En España, o/a director/a de Cooperación para América Latina e o Caribe e os responsables dos seus dous departamentos; o/a director/a de Cooperación para África, Asia e Europa Oriental e os responsables dos seus tres departamentos; o/a

director/a de Cooperación Sectorial e Multilateral e os responsables dos seus tres departamentos; o/a director/a de Relacións Culturais e Científicas e os responsables dos seus tres departamentos; o xefe da Oficina de Acción Humanitaria e o responsable do Departamento de Emerxencia e Posconflicto; o/a secretario/a xeral da Axencia e os responsables dos seus tres departamentos; o responsable do Departamento de Cooperación Multilateral e o/a director/a do gabinete técnico do director da Axencia.

Os postos directivos correspondentes aos directores xeográficos, director/a de Relacións Culturais e Científicas e secretario/a xeral serán cubertos por funcionarios de carreira. Os postos correspondentes ao director de Cooperación Sectorial e Multilateral e ao xefe da Oficina de Acción Humanitaria serán cubertos en réxime laboral, mediante contratos de alta dirección entre titulados superiores e atendendo a criterios de competencia profesional e experiencia.

Os postos directivos correspondentes aos seguintes departamentos serán cubertos por funcionarios de carreira: os departamentos das direccións xeográficas na súa totalidade; os departamentos da secretaría xeral na súa totalidade; os departamentos de Cooperación Universitaria e Científica e Coordinación de Relacións Culturais e Científicas; o Departamento de Cooperación de Organizacións Non Governamentais de Desenvolvemento e o Departamento do Fondo de Cooperación para Auga e Saneamento. Tamén será cuberto por funcionario público o posto de director do gabinete do director da Axencia.

Serán cubertos en réxime laboral, mediante contratos de alta dirección entre titulados universitarios superiores e atendendo a criterios de competencia profesional e experiencia, os postos directivos dos seguintes departamentos: Emerxencia e Posconflicto; Cooperación Sectorial e de Xénero; Cooperación Multilateral e Cooperación e Promoción Cultural.»

Seis. O número 2 do artigo 38 queda redactado da forma seguinte:

«2. Formarán parte do equipo directivo da Axencia: o/a director/a; o/a director/a de Cooperación para América Latina e o Caribe; o/a director/a de Cooperación para África, Asia e Europa Oriental; o/a director/a de Cooperación Sectorial e Multilateral; o/a director/a de Relacións Culturais e Científicas; o secretario/a xeral da Axencia; e o xefe da Oficina de Acción Humanitaria.»

Disposición adicional primeira. *Supresión de órganos directivos.*

Queda suprimida a Dirección da Oficina do Fondo de Cooperación para Auga e Saneamento.

Disposición adicional segunda. *Referencias aos órganos directivos.*

As referencias do ordenamento xurídico aos órganos suprimidos por este real decreto entenderanse realizadas aos que por esta mesma norma se crean, substitúen ou asumen as súas competencias.

Disposición adicional terceira. *Disposicións.*

Autorízase a Axencia Española de Cooperación Internacional para o Desenvolvemento para que, logo de cumprimento dos trámites que sexan preceptivos, dite cantas disposicións sexan necesarias para o desenvolvemento e a execución deste real decreto.

Disposición adicional cuarta. *Delegación de competencias.*

As delegacións de competencias, outorgadas polos distintos órganos da Axencia e non revogadas ata a data de entrada en vigor deste real decreto, continuarán sendo válidas e poderán facer uso delas os órganos competentes por razón da materia que veñan

substituír os delegados, ata que sexan expresamente revogadas ou novamente outorgadas aos diferentes órganos resultantes da aplicación deste real decreto.

Disposición derogatoria única. *Derogación normativa.*

Quedan derogadas cantas disposicións de igual ou inferior rango se opoñan ao establecido neste real decreto.

Disposición derradeira única. *Entrada en vigor.*

Este real decreto entrará en vigor o día da súa publicación no «Boletín Oficial del Estado».

Dado en Madrid o 23 de xullo de 2010

JUAN CARLOS R.

A vicepresidenta primeira do Goberno e ministra da Presidencia,
MARÍA TERESA FERNÁNDEZ DE LA VEGA SANZ